

**Qamutit mootorillit akileraarutaat pillugit Inatsisartut inatsisaata  
allanngortinneqarnerannik Inatsisartut inatsisissaattut siunnersuut**  
*Aningaasaqarnermut Nunanilu Avannarlerni suleqatigiinnermut Naalakkersuisumit  
saqqummiunneqartoq*

**pillugu**

**Akileraatarnermut Akitsuusisarnermullu ataatsimiititaliap**

**ISUMALIUTISSIISSUTAA**

Siunnersuutip aappassaaneernejarnissaanut saqqummiunneqartoq

Inatsisartut Akileraatarnermut Akitsuusisarnermullu ataatsimiititaliaa suliarinninnermini ukuninnga inuttaqarpoq:

Inatsisartunut ilaasortaq, Niels Thomsen (siulittaasoq), Demokraatit  
Inatsisartunut ilaasortaq, Harald Bianco (siulittaasup tullia), Inuit Ataqatigiit  
Inatsisartunut ilaasortaq, Kaali Olsen Inuit Ataqatigiit  
Inatsisartunut ilaasortaq, Karl Lyberth, Siumut  
Inatsisartunut ilaasortaq, Akitsinnguaq Olsen, Siumut

Akileraatarnermut Akitsuusisarnermullu ataatsimiititaliap ulloq 28. september 2010 siunnersuutip siullermeernejarnerata kingunerisaanik siunnersuut pineqartoq misissuataarpaa

**Siunnersuutip imarisaa siunertaalu**

Siunnersuutip kingunerissavaa qamutit mootorillit oqimaassutsiminnut agguataarneqarnertik malillugu akitsuutaasa 10-50 %-imik qaffanneqarnerat.

Oqinnerpaamik oqimaassusillit (900 kg. tikillugu oqimaassusillit) akitsuutaat 10 %-inik qaffanneqassaaq. Akunnattumik oqimaassusillit (901 kg.-imiit 1.500 kg.-imut) akitsuutaat 20 %-inik qaffanneqassapput.

Oqimaassutsip nutaap pilersinneqartup (1.501 kg.-imiit 1.800 kg.-imut) tassani akitsuut 30 %-imik qaffanneqassaaq. Ukiuni kingullerni qamutinik mootorilinnik oqimaannerusunik taamaalillunilu mingutsitsinerusunik eqqusuiniartoqarnerulersimanera nutaamik oqimaassusiliinermi tunngavilersorneqarpoq. Aammattaaq tamanna tunuliaqutaralugu qamutinut mootorilinnut oqimaannerpaanut (1.800 kg. sinnerlugit) akitsuutip 50 %-inik qaffanneqarnissaa siunnersuutigineqarpoq.

Motorcykelit akitsuutaat 10%-inik qaffanneqarnissaa siunnersuutigineqarpoq.

### **Inatsisartuni siunnersuummik siullermeerinnineq**

**Inuit Ataqaatigiit** siunnersuummut tapersiipput tassungalu atatillugu avatangiisinut iluaqutaasumik sunniutigijumaagassai immikkut erseqqarissarlugit. Aammattaaq **Demokraatit** siunnersuummut tapersiipput tassungalu atatillugu avatangiisinut sunniutissaata saniatigut Nunatta Karsianut iluaqutaanissaa ersarissarlugu. **Kattusseqaatigiit Partiiata** aammattaaq taakku tunngavilersuutigalugit siunnersuummut tapersiipput. **Siumut** siunnersuummut tapersersuinngilaq inuussutissarsiutillu ineriartortinneqarnissaat kiisalu aningaasartuuteqarnerunermiit allaffissornikkut sipaaruteqarnissaq tunngavilersuutigalugu. Aammattaaq biilit anginerusut mikinerusuninngaanniit avatangiisinut mingutitsinerusarnerat ilanngullugu uppersaqquneqarpoq. **Atassutip** siunnersuutip avatangiisitigut iluaqutissartai akuerai, taamaattorli siunnersuummut tapersiinnigillat illoqarfinni aqqusiniluttuni akitsuut aamma qaffanneqassamat.

### **Ataatsimiititaliap siunnersuummik suliarinninnera**

Qamutit motorillit akitsuutaat kingullermik 2003-imi (Qamutit motorillit akileraarutaat pillugit Inatsisartut inatsisaata allanngortinneqarneranik Inatsisartut inatsisaat nr. 14 7. november 2003-imeersoq) allanngortinneqarsimammat Ataatsimiititaliamit maluginiarneqarpoq. Piffissami 2003-imiit 2010-imut akinik iluarsiiissummut naleqqersuut piffissami 2003-miit 2010-mut 16 %-it missaannik qaffariarsimasoq Naalakkersuisut paasissutissiissutigaat. Taamaalillunilu akinik iluarsiiissummut sanilliullugu akileraarutip piffissami 2003-miit 2010-mut allanngortinneqarsimanngitsup 16 %-it missaannik mangiarneqarneranik kinguneqarmat ataatsimiititaliamit oqaatigineqassaaq.

Qamutit motorillit akitsuutaasaa 10, 20, 30 aamma 50 %-inik oqimaassutsini assigiinnigitsuni qaffanneqarnissaannik siunnersuut kinguneqassaaq qamutitut 900 kg.-it tikillugit oqimaassusillit akitsuutaat 2003-imut suli appasinnerusutut isigineqartariaqassaaq qaffaatissanut siunnersuutigineqartunut sanilliullugu. Qamutit motorillit akitsuutaat akinik iluarsiiissummut sanilliukkaanni taamaattoq akitsuut suli 2003-imut sanilliullugu 6 %-inik appasinnerussaaq. Tamanna motorcykelinut aamma atuuppoq.

Qamutitut motorilinnut 901 kg.-iniit 1.500 kg-inut oqimaassusilinnut tassunga assingusumik 2003-imut sanilliullugu 4 %-it miss. qaffaasoqassaaq.

Qamutitut motorilinnut 1.501 kg.-iniit 1.800 kg-inut oqimaassusilinnut 2003-imut sanilliullugu 14 %-it missaannik qaffaaneuvoq. Oqimaassuseq nutaajusoq Ataatsimiititaliamit maluginiarneqarpoq taamaattumillu sanilliussineq akinik iluarsiiisuttip ineriartorneranut akitsuut siunnersuutigineqartoq taamaallaat sanilliullugu isiginiarneqassaaq.

Qamutitut motorilinnut 1.801 kg-iniit qummut oqimaassusilinnut 2003-imut sanilliullugu 34 %-it missaannik qaffaanerussaag.

2003-imilli akitsuutit ingerlaavartumik iluarsineqartarsimannginnerat tunngaviummik pitsaasuunnginnerat ataatsimiititaliap isigaa. Nunatta Karsiata isertitaasa piffissami sivilungaaarsiartumi mangiarneqarsimanerat iluarsisarsimannginnerup kinguneraa. Ingerlaavartumik iluarsisuteqartarneq aningaasartuutit annertuumik qaffakkiartornerannut killiliisuvoq. Taamaattumik Naalakkersuisunut isumaliutersuutigeqquneqarpoq akitsuut akitigut siumut isigisumik iluarsaakkaanni pissusissamisuunnginnerussanersoq imaluunniit allatigut akinik iluarsisarneq ingerlaavartumik qulakkeerlugu, assersuutigalugu aningaasanut inatsimmi oqaasertaliussat aqqutigalugit. Tassunga atatillugu Naalakkersuisut isumaliutersuutai pillugit Ataatsimiititaliaq ilisimatinneqarnissaminik kissaateqarpoq.

Qamutit motorillit anginerusut (oqimaannerusut) mikinerusuninngaanniit avatangiisinut mingutsitsinerusarnerat uppersarneqarsimanersoq pillugu siullermeerinninnermi qularutiginnineq ersersineqarpoq. Taamatut inissisimasoqarnera pillugu Naalakkersuisut ataatsimiititaliamut nassuiaateqarsimapput qamutit motorillit anginerusut mikinerusuninngaanniit kilometerimut ikummatissamik atuinerusarmata avatangiisinullu mingutsitsinerusarnerat qularutigineqasaanngimmat pissutissaqalersitsinngitsoq ataatsimiititaliaq isumaqarpoq. Siunnersuut avatangiisinut sunniutilimmik iluaqutaasussaammat tamanna Ataatsimiititaliamit qularutigineqanngilaq. Taamaattorli akitsuutit qaffaataasa avatangiisinut sunniutaasa Naalakkersuisunit nakkutigeqqissaarneqarnissaat, taamaalilluni ilaatigut siunissami avatangiisit pillugit suliniutit sapinngisamik paasissutissanik Kalaallit Nunaanni katersorneqarsimasunik toqqammaveqarsinnaaqullugit Ataatsimiititaliaq isumaqarpoq. Aammattaaq suliaq taanna Nukissiuuteqarneq pillugu kisitsisitigut paasissutissat tak. Inatsisartut 2011-imut aningaasanut inatsisissatut siunnersuummi Konto pingarneq 73.95.03 suliarineqarneranut pissusissamisoortumik ilanngunneqassaaq. Aammattaaq Akileraartarnermut ataatsimiititaliap Naalakkersuisut kaammattussavai Eqqissimatitsinermut Avatangiisinullu ataatsimiititaliaq suliaq una pillugu ilisimateqqullugu.

Nunatsinni biilit agguaqatigiissillugu pisoqaavallaarnerat siullermeerinninnermi aammattaaq ilanngullugu uppersarneqarpoq. Taakku biilit oqinnerpaajugaluartulluunniit 80-ikkunneersut 90-ikkunneersullu avatangiisinut immikkut ittumik annertuumik eqquisarnerat, assersuutigalugu bremseminnik aqutiminnillu akornuteqarnertik pissutigalugu sillimaniarnikkut ajornartorsiortitsisinnaanerat Ataatsimiititaliamit ilimagineqarlunnarpoq. Taamaattumik nunami maani piffissanut aalajangersukkamik biilnik misissuisoqartalernissaa Naalakkersuisut tigussaasumik suliniutigisariaqaraat Ataatsimiititaliamit oqaatigineqassaaq. Tassunga atatillugu suliaqarnermi danskit akuutinneqarnissaat akuutinneqannginnissaalluunniit aalajangerneqassaaq. Sulineq taanna pillugu Eqqissimatitsinermut Avatangiisinullu Ataatsimiititaliamut ilisimatitsissuteqartarnissamik

Naalakkersuisut Akileraartarnermut Akitsuusisarnermullu Ataatsimiititaliamit aammattaaq kaammattorneqarput.

### **Siunnersuutip aningaasaqarnikkut kingunissai**

Siunnersuutip piviusunngortinneqarnerani aningaasaqarnikkut kingunerisassat siunnersuummut nalinginnaasumik nassuiaatit ataani nassuiarneqarput. Qamutit motoorillit akitsuutaasa ukiumut 2011-imi 17 mio. kr.-it missaannik ukiunullu missingersuusiorfiusunut ataasiakkaanut Nunatta Karsianut isertitsissutaasussatut missiliunneqartut tassani allassimavoq. Atugassiissutit taakku 2011-imut aningaasanut inatsisissatut siunnersuummi missingersorneqartunut konto pingaarnermi 24.11.11-imut ilaatinneqarput.

Kommunip biiliutaanut 94-inut 370.000 kr.-it missaannik ukiumut aningaasartuuteqarnerunissaq Qaasuitsup Kommuniata tusarniaanermi akissuteqaataani ilisimatitsissutigineqarmat aammattaaq Ataatsimiititaliamit oqaatigineqassaaq. Kommuninit allanit kisitsisinik takussutissaqanngilaq, kisiannili aamma taakku assingusumik inissisimanissaat ataatsimiititaliamit ilimagineqarpoq. Taamaalilluni Kommunit biiliutiminnik nalimmassaasinnaagunik aningaasartuuteqarnerunissaq apparsarsinnaassagaat Ataatsimiititaliamit ilimagineqarpoq.

### **Ataatsimiititaliap inassuteqaatai**

**Ataatsimiititaliami amerlanerussuteqartut** Inuit Ataatigijinneersut Demokratineersullu siunnersuut akuersissutigineqassasoq **inassutigaat.**

**Ataatsimiititaliami ikinnerussuteqartut** Siumumeersut siunnersuut pillugu ima oqaaseqarumapput:

Angallaneq eqqarsaatigalugu soorlu kommuninut aamma namminersorlutik inuussutissarsiortunut aningaasaqarnikkut sunniutissat naammaginartumik paasissutissiissutigineqarsimanngitsut Siumumiit isumaqarfigineqarput. Taamaattumik siunnersuummi sunniutissat paasissutissiissutigineqarnissaat siunertaralugu Aningaasaqarnermut Naalakkersuisup ataatsimiititaliamit apeqqarissaarfigineqarnissaa Siumut kissaateqarpoq kisiannili ataatsimiititaliami amerlanerussuteqartut tamanna itigartippaat. Taamaattumik siunnersuut Siumumit tapersorsorneqanngilaq isumaqarfigineqalunilu akitsuutinik qaffaanerninngaanniit inuussutissarsiutit ineriartortinneqarnissaat kiisalu allaffissornikkut sipaarniuteqarnissaq isiginiarneqartariaqartut.

Tamanna tunngavigalugu siunnersuut itigartinneqassasoq **ikinnerussuteqartut siuliani taaneqartut inassutigaat.**

15. oktober 2010

UKA 2010/26

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Niels Thomsen, Siulittaasoq

---

Harald Bianco

---

Kaali Olsen

---

Karl Lyberth

---

Akitsinnguaq Olsen